

Cànapa: unu settore chi at potenzialidades mannas

A prus de chimb'annos dae s'essida de sa Leze 242/16 "*Disposizioni per la promozione della coltivazione e della filiera agroindustriale della canapa*" sas normas chi règulan sa cànapa pro s'impreu industriale ant unu muntone de fartas chi nde sunt cumpromitende sa crèschida. Mancari chi sa Leze 242/2016 apat cunsentidu de prantare sas bariedades de cànapa previstas in su Catalogu UE, chi divent zùghere unu tantu de *tetraidrocannabinolo* (THC) intro su 0,2%, su settore non resessit a crèschere cunforma a sas potenzialidades chi tenet. A s'agabu de su 2020 in Itàlia resurtant postos a cànapa pagu prus o mancu 4.000 miza ètaras, unu sèculu a como bi nd'aiat pagu prus o mancu 130.000 e dae sa cànapa si produiant fibras tèssiles de calidade arta. In prus oe galu non b'at peruna industria chi sigat e tanchet sas filieras.

Confagricoltura est cumbinta chi custa coltura, si est abalorada a grabu bonu, diat pòdere èssere un'oportunidade de importu pro sos massajos ca lis diat dare sa possibilidade de diversificare su rèdditu agràriu, mascamente in un mamentu delicadu che a cussu chi semus colende. A su matessi tempus podet èssere un'oportunidade de bundu finas pro s'indùstria, si tenimus contu de unas cantas filieras chi si podent fraigare dae custa pranta chi at unu balore ambientale reconnotu dae totus.

Sas impresas agrìculas ant a dèvere produrre materiales pro sa bioedilizia, sa biocosmesi, sas bioenergias, su tèssile, sa nutratzèutica, cun sèberos colturales chi punnant a mantènnere, e possibilmente a mezorare, sa salute de su terrinu impreende prus pagas risorsas (naturales, enerzèticas, etc.).

Pro fàghere custu tocat de istabilire in manera crara chi su DPR 309/90 (*Testo unico* subra sas drogas) non devet èssere aplicadu a peruna parte de sa pranta de sa cànapa, duncas mancu a sas tràmulas chi sunt cussas chi ant prus balore. In custa manera si daet a su massaju sa possibilidade de abalorare totu sa pranta, cumpresa sa tràmula, ca est pròpiu in su frore chi b'at sa sustàntzia chi bisonzat a s'indùstria pro la manizare e pro che tirare cussas zenias de *cannabinoidi*, che a su CBD, chi non sunt drogas.

Difatis sa *Corte di Giustizia europea* a s'agabu de su 2020 at istabilidu chi su *cannabidiolo* (CBD) non est una droga.

Mancari chi sa Leze 242/16 no at istabilidu peruna làcana pro s'impreu de partes singulas de sa pranta e sa matessi leze nerzat chi a sos cultivos destinados a sos impreos inditados dae s'art. 2 (alimentos, cosmesi, materiales pro sas indùstrias, pro sa bioedilizia, prantas

pro su florovivaismu, ecc.) non si podet aplicare su DPR 309/90, in custos annos siat a livellu natzionale chi in Sardinna, b'at àpidu unu grustu de secuestros de prantas de cànapa chi sunt ponende làcanas a sa crèschida de su settore. Est de importu chi sos controllos sient a tretu de distinghere cussas chi sunt atidadeas agrìculas dae àteru, pro dare seguresa a sos massàjos chi traballant rispetende sas règulas.

Sa *Legge di bilancio* 2021 at postu 10.000.000 € pro sas filieras minores, e duncas finas pro sa cànapa, chi diat dèvere leare 3.000.000 €.

Est pretzisu chi sa Rezione Sardinna diat un'inditu craru, mancari cun una leze, pro sa crèschida de sas filieras territoriales ponende àteru dinare siat pro sos cultivos siat pro disinnare impiantios de trasformatzione ispainados in su territòriu e duncas punnende a fraigare sos distretos de sa cànapa. E sigamente b'at de programare su *Piano di sviluppo rurale* (PSR) dae su 2023 a su 2027 non diat èssere malu a cunsentire a chie traballat sa cànapa de pòdere pigare sos contributos de sas misuras de s'isvilupu rurale.